

28312 府頒訂養老條例。對於年逾七十。養老無資者。政府當酌量扶助。復訂定恤工保險章程。俾工人之患病及無力工作者。藉免凍餒之戚。凡此平均貧富之政策。今皆露其端倪。將來之成效必大。惟此政策。以前英人聚訟多年。卒難解決。今皆能見實行。是實由於全國惻隱之心所感召。亦即國家道德之儲力成之也。一日英議院開議愛爾蘭自治問題。余入而旁聽。聞兩黨辯論激烈。歷六小時。尙未解決。然此愛爾蘭自治問題。已相持歷數十年之久。今後殆當奏其成功。蓋英民道德之發展。必期以自由之權服人。而不以專制之權服人也。若欲詰其動力之由來。蓋亦國民道德之心爲之先導耳。復證之於此次不測之戰禍。說者謂英採募兵制度。平時養兵甚尠。一旦有事。危險特甚。然政府主張自由。不採歐洲徵兵之制。但仍沿襲成法。募集兵隊。依吉青納大將所定之計畫。應募兵二百萬。當第一次徵募五十萬時。余親見其踴躍入伍。署名軍書者。爭先恐後。擁擠至二三里之遙。故瞬息滿額。當徵第二次五十萬時。英國各大學高等學校生徒。聯名入伍者。計有五千餘人。召募時皆集於倫敦之大公園。余子亦預列焉。其他團體之報名從軍者甚多。至於國民。無論何種階級。皆願捨身爲國。是亦英國道德發展之明證。故戰爭之事。雖爲世人所憂慮。然國家道德之儲力。往往至是而發現。是即道德與國家相關係之明效大驗。余對於中國所進之忠告。亦冀全國人民。有以養成國家道德之儲力。勿徒託愛國之空言。恣談強國之政策。而自謂足以救國已耳。

### 遠東運動會小史

歐美各國人民。對於體育一端。注意非常。一學校一城市。有一學校一城市之運動會。一國有全國運動會。各國有萬國之厄靈辟克運動會。溯其起原。遙在希臘極盛時代。近時恢復古制。每四年舉行一次。第一次舉行於雅典。時在一千八百九十六年。至一千九百年。舉行第二次於巴黎。其後四年。舉行第三次於美國之聖路易。第四次在倫敦。第五次在司篤亨。然此厄靈辟克運動會預賽之體育家。均爲歐美諸國之人。遠東之國。始終未遣代表。遠東諸國至一千九百十二年自行發起一遠東厄靈辟克運動會。以一千九百十三年二月一日至二日舉行第一次大會於菲律賓之馬尼勒。預賽者爲中國日本及菲律賓。此次國際競爭。菲律賓雖得第一。中國體育家亦殊不弱。奪得錦標歸者。有潘文炳葉桂福諸君。會畢。舉中國之伍廷芳博士爲會長。並訂於本年五月十五日至二十五日。在上海舉行第二次運動大會。此次運動會。贊成員領袖爲袁大總統。除如黎副總統周自齊總長蔡廷幹上將張季直總長等。均爲贊成員。而總幹事部則伍廷芳博士爲幹事長。加拿大柯樂愷爲名譽書記員。聶雲台爲名譽會計員。而唐少川鍾紫垣張伯苓三人爲幹事云。